



Aqqalu C. Jerimiassen
Atassut

UPA 2024/35 - 3
16. maj 2024

Uunga siunnersuut Aalisarneq pillugu Inatsisartut inatsisaat (Aalisarnermut Piniarnermullu Naalakkersuisoq)

Ernumanartoq pingaluttualerpoq, ataatsimiitsitaliarluunniit allaat Naalakkersuisut allannguutissaannut utaqquinissaq pisariaqartissimangilaa, tassami ilassutitut isumaliutissiissut Naalakkersuisut allannguutissatut siunnersuutaannit takkupoq.

Taava tassa nalorninartua tulleq takkupoq, ataatsimiitsitaliami amerlanerussuteqartut innersuuppaat aappassaaneerneranit ilusaa atorneqassasoq, tassami Naalakkersuisut allannguutissatut siunnersuutaat suli takkutinngitsoq atsiugaammat.

Qalerlittassanik toqqaannartumik toqqaannanngitsumillu pigisaqarsinnaanerup qilaalernissaa ikkunneqalerpoq, tassa imaappoq, suliffeqarfiiit namminersortut piginneqatigiinnit arlalinnit pigineqartut ajutooraluttualeqaat. Kisiannimiaasiit arlaannit saamerliit utoqqatsissutissaqassapput tassunga isummamut.

Naalakkersuisooqatigiit partiivi inatsisisap aappassaaneerneqarnerani oqarput, unagooq inatsisisaag akuerineqarpat aningaaseriviit ammaassiumaartut, taamaattoqarpaa, suminngaanniiguku tamakku uppernarsaatissallit?

Uagut uppernarsaatissallit allagaatit pigisarivagut, tassalu Grønlandsbankip pisortaanerata oqaaseqaatai, imatullu naatsukullammik ilaatalanneqarsinnaasut: “piujuannartitsineq aallaavigalugu pisassiisarnermut aaqqisoqartinnagu atukkiinissaq ammarneqassanngilaq”.

Oqaaseq ersarikkalaqaq, ila ersarikkalaqaq, soorliuna partiit saamerliit taama tassani apeqqummimita manngertitartigisut?

Taamaattoq allannguutissatut siunnersuummi quppernerup aappaani pisortat suliffeqarfiusaasa siunissami namminersortunut ikaarsaartikkiartuaerneqarnissaa allaaserineqalersimavoq, tassanilugooq patsisaalluni pisassat peerneqarpata taarseeqqusilernerit pinnginniassammata.

Taava aajuna maanna apeqqut pinngortoq; sooq taava namminersortut arsaarnissaat taama ajornanngitsigivamita? Akissutissaq eqqoriaannarsinnaavara; siaarneqassamatagooq pisassat.

Tassani periuseriniarneqartumi qularinngilara Karl Marx suli peqqittuuguni assut nersualaassangluuraasi, tassami communist manifestomi allassimasut atortuatsiaanialerassigit.

Uagut Atassummi tapersinngilluinnarparput pisortat suliffeqarfiusaasa mianernartutut pineqarnissaa, illuani suliffeqarfik namminersortoq pilluarujussuarlugu allaallumi nittartakkakut kikkut tamarmik takusinnaasaanik siorasaarisutut naqissuserlugu nikanarsarlugu.



Atassummiit aalisartut amerlaqisut toqqisisimannngitsut malugisinnaangatsigu maani inersuarmi qiningaaqatigut qituliulaaqqungaluaqaagut, oqarfigilaarusukkaluarlugit: “tusaalaarsigit nilliapput, nilliapput ernumallutik”!

Qaleralinniarnermi TAC pinngortitaleriffiup innersuussutaanit inissinneqassanersoq assut pissanngatigaarput Atassummiit, tassami sunniutissaattaaq tassani qanoq aningaasaqarnitsigut aaqqierneqarunnersut paaserusunnarami. TAC-lu ilanngarneqarneratigut PNNP-nut ikaarsaanngitsut paggatassiissutiminaarsunngortussanik atuiinnarusuttuq qanoq annertutigisumittaaq ilanngaavagineqassanersut erseqqarissumik inissittariaqarpoq.

TAC uumasorsiuut innersuussutaannut apparnerisamitami kingorna naalakkersuisooqataasut partiiaita inussiaataasutut taasaat qanoq iliorfiginarneqarnersut assut paaserusunnarsivortaaq, kiap akiliuttussanngussanerai “inussiaataaneranniit” kaanngartinniarlugit.

Namminersortut uagut Atassummiit taakkutikkusukkaluarpagut ukkannerusassagut qujagerulaarlugit, qujaffigalugit suliffissaqartitsimmata ukiorpassuarni, ilaqtariippassuarnullu napatitseqataasuullutik, imaanngittooq angusarissaarmata pillarlugit.

Avannaq ingerlalluartoq kallualeqaarsi, nunatta aningaasivissua erisalerparsi, taakkulu kujavariallugit immaqa qummoroortillugit.

Isumaliutissiissummiittoq oqaasertaliussaq kingulleq innersuussutigineqartoq misissoqqullugu, tassalu aningaasalersuisarnermut nalornissutaasut misissorneqarnissaat, sumut atussagatsigu inatsit pingajussaneerneqarluni atuutsinneqalereerpat taakku pissariarigutsigit?

Raajarniarnermi namminersortunut immikkoortitsiniarlusi sooruna oqariiginnarusunngilasi erseqqinnerusumik? Nuannaarnerullutiguna naapeqatigiiffigisinnaasaat tamaasa 25%-imut inissillugit qasileqaa arlaatiguut?

Atassummiit oqaqqiinnarumavugut, tamatta eqqissilluta sooq piitsooqatigiittariaqarnerput paasiuminaatseqaarput. Naallu amerlanerussuteqartut akuersissutigineqarnissaanut innersuussaqareeraluartut oqaqqilaarumavunga: qiningaaqatinaa avannaaneersut, takusinnaangilisiuguna suna ornilernerlusiuuk?

Taamatut oqaaseqaateqarluta inatsisissap pingajussaneerneqarnerata ukiamut kinguartinneqarnissaa kissaatigaarput, taamaassinnanngippallu Atassummiit inatsisissamut akerliulluta taassisalluta taasinnaavarput.